

名

山

藏

名山藏卷之

晉江何喬遠

輿地記

南京

南京古金陵地周秦時已有天子氣吳晉宋齊梁陳及南唐都此而皆偏安太祖混一天下以爲京師永樂中遷都北京正統中以北京爲京師遂以此爲南京城盡鍾山之麓周迴九十六里門十三南曰正陽南之西曰通濟又西曰聚寶西南曰三山曰石城北曰太平北之西曰神策曰金川曰鍾阜東曰朝陽西

曰清涼西之北曰定淮曰儀鳳其外城則因山控江  
周迴百八十里別爲十六門曰麒麟曰仙鶴曰姚坊  
曰高橋曰滄波曰雙橋曰夾岡曰上方曰鳳臺曰馴  
象曰大安德曰小安德曰江東曰佛寧曰上元曰觀  
音內城曰皇城太祖初宮曰舊內之城壇則天地山  
川社稷廟則太廟文廟陵曰孝陵苑囿則漆園桐園  
棧園樹三種樹以備造船以爲海運防倭之用以省  
取民之費官署則文武臣周列焉

應天府禹貢揚州之域分野斗周爲吳春秋屬越城  
於長于江東人謂山隤開曰于楚滅越埋金以壓王

氣曰金陵邑秦始皇改曰秣陵又以歷金陵漢曰丹陽郡孫權定都曰建鄴晉曰秣陵尋分秣陵北爲建業改鄴爲業建興初爲建康東晉宋齊梁陳竝以爲都陳廢郡更置蔣州於石頭城漢蔣子文尉秣陵逐盜死蔣之爲州蓋取其姓唐爲揚州爲蔣州爲江寧郡爲昇州南唐李氏復爲都宋昇州江寧府建康府元建康路集慶路皇朝丙申年爲應天府領縣七上元江寧爲赤縣溧陽溧水句容江浦六合爲畿縣弘治五年折溧水置高淳縣領縣八山曰鍾山水曰長江鍾山蔣子文死處吳大帝廟祀之避其祖諱改鍾

爲蔣又曰紫金山晉元帝渡江以其山有紫氣又曰  
北山齊周顒所隱孔璋所爲作移文者也皇朝以孝  
陵在焉封爲神烈山鍾山之陰則中山王開平王岐  
陽王諸功臣之墓靈谷寺在山東覆舟之山臨于玄  
武之湖雞籠山在覆舟山西皇朝測象其上名欽天  
山麓列十廟曰北極真武廟曰都城隍廟曰祠山張  
渤廣惠廟曰五顯靈順廟曰忠臣蔣子文廟曰漢壽  
亭侯關羽廟曰忠貞主壺廟曰武惠王曹彬廟曰南  
唐忠肅王劉仁瞻廟曰元衛國忠肅公元臣福壽廟  
而帝王廟功臣廟亦在焉石頭山諸葛亮曰石頭虎

歸者也獅子山在都城內太祖所欲建閣江樓而  
者也戚家山在城南五里前爲大報恩寺聚寶山細  
石如瑪瑙鳳臺之山是爲鳳凰之臺白山之石石可  
碑礎攝山之草草可攝生土山謝安賭墅焉亦名東  
山墩曰謝公牛首山一名天闕山三山濱于大江謝  
眺所爲賦淨練李白所爲詠青天者也長江天所限  
南北也河曰上新舟楫所聚水曰秦淮水始皇斷方  
山長壟爲瀆名秦淮焉又水曰八功德山龍沸泉以  
予梁時胡僧玄武湖太祖貯天下圖籍其中以絕火  
患圖籍又患鼠有老人入見請多畜貓守之老人姓

毛貌類貓精上曰煩乃公老人葬此湖絕鼠矣井曰  
景陽亡國之井也湖曰莫愁麗人之湖也臺曰雨花  
異僧之臺也樓曰來賓曰重譯曰清風曰石城曰鶴  
鳴曰醉仙曰樂民曰集賢曰謳歌曰鼓腹曰輕煙曰  
澹粉曰梅妍曰翠柳太祖所建以來遠人者也關曰  
大勝曰龍江曰石灰橋曰大中日淮清附郭上元江  
寧二縣

上元縣凡編里二百有三

江寧縣凡編里七十四

東九十里曰句容縣以縣有句曲山句曲山茅山也

形如巳字句曲而有所容故名句容是爲三茅君所居山石次玉禹貢之瑤琨也茅山北有良常山秦始皇登此曰巡狩之樂莫過山海其繼自今良以爲常又山曰秦望仙韭山姜叔茂種五辛菜以易丹砂今多大韭焉青龍山高三十八丈周廻五里洞曰青龍與金壇句曲諸洞通絳岳山一名丹山丹陽所取名也華陽洞洞有五門三顯二隱中有陰暉夜光日精之根陰暉主夜日精主晝形如日月之光白李溪上有白李食之得道高辛時展上公所種縣西二十里曰通德鄉有朱家巷皇朝自德祖而上族居世葬焉



太祖渡江訪求宗族得數十人與叙親親西去有古  
瑩故塚相傳爲臥龍岡朱家塚百姓至今呼爲皇陵  
嘉靖中邑人王暉爲江西巡撫都御史請建園廟其  
地下南京禮部侍郎崔銑江西巡撫都御史夏邦謨  
等覆覈曰太祖未嘗言也議遂罷顏真卿墓在縣東  
凡編里一百五十一

東南二百四十里曰溧陽縣秦置以在溧水之陽山  
曰岳山昔岳姥于此得道石屋山歐冶所鑄劍也三  
王山一名三首山楚王與省間尺并一客三首葬此  
省間尺干將之子也湖曰洮湖東連于震澤五湖之

一也千里湖陸機所謂末下鹽豉者也投金瀨擊絲  
女子以食子胥有李白之碑江曰中江禹貢之二江  
也城曰平陵凡編里二百二十六

東八十五里曰溧水縣中山一名濁山濁者獨也兔  
毫可筆隨船山一名感泉山其陰有青絲洞之泉東  
廬山嚴子陵嘗廬焉膳脂湖在縣西十里國初命崇  
山侯穿流通運侯煨石鑿之其石盡赤遂名湖曰膳  
脂丹陽湖李白所常遊也周左伯桃之墓在縣南凡  
編里二百五十二

西四十里曰江浦縣本楚棠邑是爲烏江縣地洪武

九年以邇於京師割六合縣及和滁二州地折置二十四年復割江寧縣一鄉益之定山沈約所爲晚蒞之詩也四潰山項羽敗垓下走至東城從二十八騎依山拒兵此山也陰陵山項羽所迷失道者也凡編里二十四半

西北百三十里曰六合縣楚棠邑瓜步山有鮑照揭文小帆船鮑照銘險焉凡編里十七

二百四十里曰高淳縣古鎮也弘治四年都御史侶鍾府尹樊瑩以地曠難治奏置縣遊子山孔子適楚所經秀山在縣東南路有四之字痕仙人以鞭畫路

爲之字形四面皆應山中松柏伐之旋生湖曰卞陽  
凡編里四十

鳳陽府徐揚豫三州境古塗山氏國春秋鍾離國麇  
姓徐子之別封後爲楚邑秦九江郡漢鍾離縣唐豪  
州以地枕豪水後旁加水宋爲團練州後屬淮南路  
皇朝爲帝鄉鍾離西鄉太祖所生地吳元年爲濠州  
尋改臨濠府洪武二年爲中立府定爲中都立宗社  
建宮室以泗邳徐宿壽和光六安信陽九州爲屬而  
將定鼎馬旣不果七年知府張遇林言信陽道遠艱  
期會請易他州遂以滁州并來安全椒二縣隸本府

以徐州并碭山蕭沛豐縣爲直隸以邳州并睢寧宿遷縣隸淮安以六安縣并英山縣隸廬州府以光州并光山固始信陽息隸河南汝寧府遷府治萬歲山鳳凰山之陽名府曰鳳陽府十九年以滁并來安全椒爲直隸領州四縣十四仁祖淳皇帝后陵在西南太平鄉號皇陵皇陵碑太祖御製西北二十五里曰白塔墳十王四妃在焉十王四妃太祖諸父諸兄諸母也別見中山王徐達永豐鄉射子口人東甌王湯和廣德鄉東湖村人其餘從太祖定大干諸功臣是府爲多

隋郭口鳳陽縣萬歲山在皇城北城垣經其上山東  
峰曰日精西峰曰月華皇朝建都所名也山曰鑛鄒  
昔人鑄劍焉水曰淮曰濠凡編里三十六

東北二十里曰臨淮縣雲母山山生雲母彭祖所服  
鍾乳山濠源出焉濠有二源一出此山一出鳳陽縣  
之鑛鄒山二水合流歷鳳陽縣東境至本縣西南有  
石絕水謂之濠梁凡編里四十九

南九十里曰定遠縣梁山韭山多韭茅山多茅大紅  
之山是多紅石漆園在縣東莊周所吏古陰陵城以  
項羽名滁陽王郭子興是此縣人凡編里三十三

西七十里曰懷遠縣荆山在縣西有玉坑有抱璞巖  
祝和父方輿勝覽皆云卞和得玉乃南漳之荆山舊  
志在此蘇軾詩注云荆山下有卞氏採玉坑石色如  
玉不受鏡刻卍出山下輒變色不復溫瑩塗山在縣  
治東南八里禹會諸侯娶于塗山氏女有禹會之村  
啓母之廟淮水出荆塗二山間禹所鑿也渦河在縣  
北一里洛河淝河皆與渦河入于淮常遇春花雲朱  
能是此縣人晉則桓溫凡編里四十

東北百一十里曰五河縣宋名以沱滄濬澶交流與  
淮河合名凡編里十五

東北二百五十里曰虹縣漢名王莽名曰貢虹貢同  
首水曰蘄水鄧愈是此縣人漢則朱買臣凡編里十  
六

東二百十里曰泗州楚世家曰越已滅吳不能正江  
淮楚東侵廣地至泗上有徐城古徐子國墳城禹貢  
徐州墳珠是也珠母名墳義城在州西管鮑於此分  
金吳季札掛劍臺在城東北安河西岸唐西域僧伽  
來此州建寺是名泗州佛熙祖裕皇帝后陵曰祖陵  
在州東北十三里凡編里四十五領縣二

州南七里曰盱眙縣秦名張目曰盱舉目曰眙以縣



在山上可張舉望遠春秋屬吳爲善道魯襄公五年  
仲孫蔑衛孫林父會吳於善道劉項共立楚懷王孫  
心于此今其城曰小兒城第一山米芾所書都梁山  
隋置離宮曰都梁是生都梁之香下龜山在縣東北  
三十里嶽瀆經云禹治水至桐栢獲淮渦水神巫支  
祁形猶獼猴力踰九象乃命瘦辰制之其時木魁水  
靈山妖木怪奔號叢繞幾以千數瘦辰持戟逐去遂  
鎖于龜山之足淮水乃安河曰池曰津里曰木場皆  
發源此縣淳皇后父陳揚王居此縣漢英亦此縣人

州東南百五十七里曰天長縣唐曰千秋銅城鎮吳  
工於此鑄錢其人朱壽昌凡編里十二

西北二百三十三里曰宿州宿國風姓男爵春秋莊  
公十年宋人遷宿是爲閔子之鄉孝慈高皇后是此  
鄉新豐里人打鼓山山如鼓鳴歲則大稔淝水源出  
于龍山蘄縣城在州南四十里陳勝吳廣起兵於此  
有古符離城城北十里曰徐王墳高皇后父墳也春  
秋秦蹇叔銍人銍是此縣稽康徙家銍稽山遂以爲  
氏凡編里七十領縣一

州東百二十里曰靈璧縣以縣有磬山名禹貢云泗

濱浮磬孟山在縣東北孟子嘗遊有杪櫛之樹伐之  
有聲枝葉先發之方其方則豐浹水在縣東故漢浹  
縣漢志浹水所出南入淮東漢書浹有垓下聚凡編  
里三十八

西百八十里曰壽州春秋楚附庸州來之地左傳成  
公七年吳入州來楚春申君建碑曰壽春淮南王劉  
安都焉元末劉福通所據峽石山在下蔡西南兩崖  
相對石有禹鑿跡八公山淮南王八公也符堅伐晉  
望此山草木皆兵矣西南有安豐城地有芍陂楚孫  
叔敖所作有倚相墓宓子賤墓甘茂梅福召信臣呂

夷簡米芾皆此州人凡編里五十四領縣二

州北百八十里曰蒙城縣東漢山桑侯國曰山桑縣是爲莊周之鄉有范蠡之墓凡編里十八

西南百二十里曰霍丘縣隋名周公封霍叔監殷縣西有霍叔故宮遺址文獻通考以爲晉州霍邑殷在今河南縣去河南爲近當此是也縣東有紂王城西漢曰蓼縣蓋古蓼國偃姓皐陶之後澧豐二河之源出焉龍池張路斯與其九子變龍處也凡編里二十

二

西四百四十里曰潁州隋名周爲胡國媯姓伯爵春

秋魯定公十五年楚滅胡其地屬楚秦滅楚爲潁州郡地兩漢爲汝南郡之汝陰縣潁河在州西夷陵在州東春秋楚子陳侯鄭伯盟于辰陵杜氏曰辰陵陳地潁川長平縣東南有廢鄴丘縣廢沈丘縣廢平輿縣廢鄆陽縣廢永安縣有沈諸梁黃霸墓漢何比干陳蕃范滂晉畢卓皆此縣人蕃平輿人卓鄆陽人歐陽修終老此州蘇軾蘇轍竝知此州凡編里七十領

縣二

州東百二十里曰潁上縣隋名管夷吾是此縣人甘城驛甘羅之鄉也隋張路斯家此縣之百社村凡編

里十三

州西北八十里曰太和縣宋萬壽縣凡編里三十  
西北四百五十里曰亳州周武王封神農後于焦此  
縣也春秋陳國焦邑西漢譙縣魏譙郡元末韓林兒  
所都洪武初爲縣弘治九年巡撫都御史李蕙奏改  
爲州桑林湯所禱雨也桐宮太甲放焉縣東百二十  
里曰流星園老子所生地曹操亦此縣人陳搏縣之  
眞源人有城父村古城父縣左傳僖二十三年楚成  
得臣率師伐陳遂虓焦夷註焦譙縣夷城父也大饗  
堂魏文帝幸譙父老於帝故宅立大饗碑曹植文梁

鴻鍾繇書篆富弼歐陽修皆嘗知此縣凡編里四十  
六

蘇州府揚州之域分野斗宿自周太伯始號勾吳武  
王克殷封其後闔閭城之曰吳都後亡于越楚滅越  
以其地封春申君秦置會稽郡世稱吳門爲吳會謂  
其地本吳會稽二縣也漢高立從兄賈爲荆王都吳  
更會稽爲荆國十二年封兄子濞爲吳王後國除復  
爲郡順帝時分浙西爲吳東爲會稽孫吳分置吳興  
郡晉置毘陵郡東晉爲吳國隋曰蘇州吳州吳郡唐  
蘇州吳郡黃巢之亂沒于錢鏐南唐代之宋改平江

軍平江路元平江路後爲張士誠所據曰隆平府皇朝吳元年爲蘇州府直隸京師領州一縣七附郭吳長洲山曰天平水曰震澤

吳縣天平山吳鎮也橫山四面皆橫巫咸山巫咸所葬香山吳王種香焉支礪山晉支遁所隱何山梁隱士何求何點葬處靈巖山有館娃宮西施洞響屨廊香水溪遺跡胥山吳人以祀伍子胥姑蘇山姑蘇臺在其上穹窿山赤松子採赤石脂焉太湖三萬六千頃禹貢曰震澤周禮曰具區曰五湖洞庭山在太湖中四面水包之亦名包山或云仙人鮑靚所居亦曰



林屋山林屋洞靈威丈人得羽書焉莫釐山一名胥  
母視包山差小山西之石清以潤山東之石黃以燥  
西宜梨東宜枇杷西有兔無雉東有雉無兔石湖在  
縣西南范蠡從入五湖處三江口在縣東南三十里  
松江婁江東江也有銷夏之灣錦帆之徑雞陂鴨城  
皆吳王遺跡有孫武干將慶忌要離之塚凡編里五  
百一十一

長洲縣陽山在縣西北三十里高八百五十餘丈逶  
迤二十餘里以其背陰面陽故名陽山亦名秦餘杭  
丁令威宅在此山虎丘山吳王闔閭葬其上殉以黃

金珠玉扁諸之劔魚腹之干越三日白精結爲白虎  
踞其上白石山春申君所名也澹臺湖澹臺子羽南  
游至焉河曰運河長洲苑在西南七十里凡編里七  
百四十一

東七十里曰崑山縣梁名本婁縣地吳張昭陸遜並  
封婁侯有崑山故城吳子壽夢所築天女之墩墩皆  
茅葺中貫一路若經行雖植之草不生世傳有天子  
女葬此江曰新洋湖曰澱山凡編里三百三十八

北百五里曰常熟縣南北朝名山曰虞山亦曰海虞  
上有言偃墓仲雍墓在山北有拂水巖江曰大江港

白茆凡編里五百十四

東南四十五里曰吳江縣五代梁名吳江在縣東禹貢三江之一曰吳淞江古笠澤江也春秋時越伐吳軍笠澤有睡龍之灣宋高宗所駐蹕泉曰六品爲江南第六泉鬪鴨闌陸龜蒙之闌鴨能人言凡編里五百六十二

東百四十里曰嘉定縣宋名以年紀寶山在縣東南八里永樂中平江伯陳瑄督海運築上山爲表望烽火在其上高三十餘丈周廻十五里有御製碑文江曰青龍塘曰練祁凡編里六百六十八

東百六里曰太倉州本崑山常熟嘉定三縣地吳元年立太倉衛洪武十二年立鎮海衛弘治十年爲州穿山石洞前後通徹昔有海行者舉帆經其中凡編里三百十二領縣一

州東二百八里曰崇明縣在海中凡編里百一十松江府揚州之域分野斗周吳地後爲越爲楚秦婁縣地屬會稽郡漢因之唐華亭縣以吳子壽夢之亭名宋爲嘉興府屬邑元爲松江府以府北有松江皇朝直隸京師領縣三山曰九峰水曰松江

附郭曰華亭縣壽夢築華亭蓋亭留宿會之所後吳

封陸遜爲華亭侯陸機陸雲是此縣人機山以機名  
橫雲山以雲名平原村以機爲平原內史縣名雲間  
以有雲間陸士龍之稱崑山之下爲陸氏先塚機雲  
旣生人以比琨玉故名山曰崑簞山以竹箭名澱山  
在澱湖中坡名鶴坡以華亭之鶴華亭之鶴足有龜  
紋者貴江曰松又江曰滬瀆又江曰青龍湖曰柘曰  
澱三泖之水有上泖中泖下泖冬溫夏涼是生鱸魚  
蓴菜厥鱸四腮五色泉葛洪投丹而湧五色崑山南  
有奏皇馳道陸機宅在城南有黃耳塚凡編里八百

東北九十里曰上海縣以居海上洋宋爲上海鎮石  
筍灘沙中有石如筍赤烏碑在靜安寺凡編里六百  
三十

西北四十里曰青浦縣嘉靖二十一年設後革隆慶  
六年復設

常州府揚州之域分野斗周爲吳延陵季子采邑後  
屬越後又屬楚秦會稽郡地漢因之東漢分屬吳郡  
三國吳分無錫以西爲屯田置典農校尉晉毗陵郡  
東晉晉陵郡隋常州唐常州晉陵宋常州皇朝爲府  
直隸京師領縣五山曰三茅水曰太湖

附郭曰武進縣三國吳名漢丹徒曲河二縣地三茅山舊名橫山晉將軍曹橫葬此黃公山春申君黃歇所封龜山與黃公山對宋楊時寓其下江曰大江太湖之湖連武進無錫宜興三縣界震澤也中有馬跡山以秦皇得名又湖曰陽湖河則運河瀆曰孟瀆唐刺史孟簡所開有奔牛之鎮漢時有金牛出入柵之牛驟奔凡編里四百有八

東南九十里曰無錫縣漢名泰伯始封地其墓尚存錫山在縣西周秦間產鉛錫古銘曰有錫兵天下爭無錫寧天下清有錫沴天下弊無錫又天下濟漢光

武以後錫絕故名縣慧山泉泉爲天下第二龍山在縣西越絕書縣西有龍尾陵道春申君所築夫椒山在太湖濱夫差敗越處也歸山夫差投子胥江中而吳人望其歸胥山吳人祠胥焉湖曰蠡曰濠蠡湖范蠡伐吳所開河曰弓河溪曰梁溪有秦觀之墓凡編里二百六十

東北九十里曰江陰縣梁名國初爲連洋州尋爲江陰州後爲縣君山黃山皆以春申君名秦望山秦皇所登亦曰秦履稷山唐薛稷別業延陵季子墓是孔子題碑蕭山瀕江是生河鮑子鱗子鱗之魚以薦大



廟凡編里三百七十四

南百二十里曰宜興縣宋名吳荆溪地秦陽羨縣隋曰義興荆南山在荆溪之南亦曰銅棺山東漢袁玘爲陽羨長一夕死亡其柩邑人夜聞此山有千人聲往觀則柩在尋成塚蒿山產茶唐貢山茶唐時以貢頤山唐陸希聲所隱潛虬之泉是生異魚四足蜀山故名獨山蘇軾改曰蜀以其類蜀中國山故離里山吳孫皓時山大石自立封爲南嶽改曰國山山山漢封將澄爲山亭鄉侯張公洞張道陵所修道也善卷洞在國山東南周幽王時山忽開裂自露奇怪瀉河

昔有得龍卵其地者陷而爲河東溪又名晷畫溪  
又溪曰狀曰竹瀆曰百瀆其人曰周處凡編里三百  
四十

東北百三十里曰靖江縣本馬馱沙地成化七年置  
在江中山曰孤山凡編里五十五

鎮江府揚州域分野斗春秋吳地後屬越屬楚秦會稽郡漢初荆國後屬江都國後屬會稽郡東漢吳郡三國吳始都于此及遷秣陵乃置京口鎮爾雅絕高爲京是城因山爲壘緣江爲境故名鎮京口隋潤州以州東有潤浦唐潤州丹陽宋鎮江軍鎮江府皇朝

初爲江淮府後改鎮江府直隸京師領縣三山曰北固水曰楊子

附郭曰丹徒縣秦始皇以地有王氣使赭衣三千鑿陷京峴山縣以此名丹徒北固山是京峴山之支在城北以下臨長江其勢險固梁武帝嘗幸之改曰北顧山有甘露寺吳甘露中所建有石如羊曰狼石金山一名浮玉山在江中唐裴頭陀開山得金因賜名中冷之泉是爲天下第一焦山在江中後漢焦光隱焉有瘞鶴刻銘銀山直金山元人表之曰銀山蒜山多蒜亦曰周瑜與諸葛亮於此籌筭拒曹黃鶴山有

鶴林寺宋武帝微時所遊招隱山戴顓所隱也馬蹟山是爲四十九福地曹山太祖駐蹕焉城曰鐵甕吳大帝所築言其堅也江曰大江亦曰京江有葛洪井丁卯橋唐許渾皇朝楊一清之所隱也凡編里二百七十

東六十里曰丹陽縣秦雲陽縣始皇鑿北固使其阿曲改名曲阿吳曰雲陽晉曰曲阿唐雲州簡州後爲丹陽縣練湖亦曰練塘亦曰曲阿後湖馳道在城北秦馳道之一也縣東五十里曰呂城呂蒙所築是生香草薺茺凡編里百六十

東南一百三十里曰金壇縣本秦曲阿縣之金山鄉唐曰金山復爲金壇茅山一名勾曲山華陽第八洞天也山西屬句容縣界顧龍山太祖題詞寺壁有御亭荆溪在縣北有荆王廟漢荆王劉賈與黥布戰死人廟之石墨池在縣西費長房於此書符滌硯澗石墨墨凡編里百三十六

揚州府禹貢維揚分野斗牛春分屬吳後屬越戰國時屬楚秦九江郡漢廣陵郡漢高王英布淮南屬淮南王從兄賈荆王屬荆王九子濞吳王屬吳漢景徙汝南王爲江都王屬江都漢武立子胥廣陵王屬廣

陵東漢廣陵唐南兖州邗州揚州廣陵宋屬淮南東  
路皇朝初爲淮海府後爲淮揚府後改揚州府直隸  
京師領州三縣七按古揚以地近陽位又江南之氣  
燥勁厥性輕揚亦曰州界多水水波揚也廣陵以地  
多陵阜名揚之爲字漢書從手晉書新唐書從木舊  
唐書通典從阜今從手如禹貢王恕嘗知此府山曰  
蜀岡水曰揚子

附郭曰江都縣河曰官河亦曰漕河是吳邗溝夫差  
穿以通江淮有邗溝蕪城吳王濞城也以其荒蕪曰  
蕪城鮑照有蕪城賦崑曰崑崗鮑照賦軸以崑崗又

岡曰蜀岡上有蜀井洞曰玉勾洞有道士持書謁帥  
守字皆雲章帥守使躡之則入後土祠井中帥守使  
入入井視之見洞額曰玉勾復入則水漫莫睹埭曰  
名伯謝安作鎮人比名崇故名埭名伯鎮曰瓜州以  
沙磧如瓜觀曰瓊花樓曰文選又樓曰迷灣曰茱萸  
橋二十有四邵陵是此縣人縣故有東陵亭白紗湖  
岸有浣紗女投江而死以明不洩伍員之奔其後伍  
員訪女不得畱雞祭之今其山曰雞畱山是陵有聖  
母廟聖母生而人妖之脫桎梏蛻去井曰董井仲舒  
傳江都時居宅井也有孔融墓凡編里百一十八

西七十里曰儀真縣宋名宋人鑄玉皇聖祖太祖金像於建道觀若謂得其真儀故名儀真山曰瓜步江曰揚子江心之水是名南泠唐歲五日鑄鏡則於江心蕩曰黃天凡編里十四

東南百四十里曰泰興縣南唐名以自泰州折置本隋唐海陵縣凡編里百十一

北百二十里曰高郵州秦築郵亭因名秦郵漢置高郵縣以地據揚楚之脊東晉曰三阿劉宋以產嘉禾名神農郡宋爲承州後爲軍皇朝爲縣洪武元年爲州神居之山有排牙之石莫得而數也數之必差有



甓社湖露筋廟弘治中戶部侍郎白昂開湖堤之以  
避舟患賜名康濟人曰秦觀凡編里八十領縣二  
州東百二十里曰興化縣揚吳名平望之湖嘗有古  
劔出於湖阜之墓中屈之首尾相就識者曰是爲繞  
指柔洲曰百花縣人宗臣所遊賞也凡編里七十二  
州北百里曰寶應縣唐名以上元中獲定國寶漢平  
安縣東漢安定縣范仲淹嘗知此縣湖曰白馬又湖  
曰范光禽則產鶴凡編里三十四

東百二十里曰泰州南唐名漢海陵倉元狩爲海陵  
縣唐曰吳陵曰吳州曰海安鹽場所聚白駒塲張士

誠於此起事中洲山是范仲淹所築繚絲井天孫爲  
董永織錦取水此井韓琦知此州有捧天之夢禽則  
產鶴凡編里百七十八領縣一

州東南百四十五里曰如臯縣賈大夫所射雉也凡  
編里四十二

東四百里曰通州後周名狼山在楊子江邊五山相  
屬高五十三丈周四百三十六丈其形如狼有狼山  
廟以祀江神正德七年流賊劉宸等舟蔽江下遇風  
盡壞窮而匿殿後總兵官劉暉卻永攻之不得火廟  
不燃禱于江神逆風焚溺遂殲之朝命更作新廟焉

山頂有始皇鞭石之跡凡編里百有七領縣一  
東一百里曰海門縣以在海濱名島曰海門島凡編  
里三十七

淮安府揚州之域分野斗牛春秋屬吳後屬越戰國  
屬楚秦九江郡漢屬臨淮郡為廣陵國東漢廣陵郡  
下邳國唐淮陰郡宋楚州泗水州漣水軍淮安軍淮  
安州皇朝為直隸領州二縣九

附郭曰山陽縣山鉢池其形如鉢草木不生王子喬  
所鍊丹也河曰淮河運河故沙河皇朝平江伯開通  
曰清江浦湖曰射陽漢高封項羽為射陽侯廣陵王

言坐罪此湖見慈堰曰高家當泗合流之衝東  
與黃河會入于海甘羅城甘羅所築時有小錢  
中狀如鐘篆文不可識人名甘羅錢公冶長枚臯  
定國墓皆在縣境韓王庄韓信生處也凡編里百

一  
東南二百三十里曰鹽城縣漢射陽鹽漬水曰海河  
曰新運河舊運河凡編里九十三

西五十里曰清河縣古泗口有大清河小清河源出  
山東泰安州凡編里三十六

東北九十里曰安東縣漢襄賁昌慮水曰漣水湖曰

石澗湖面約三萬四千五百有餘丈與海州沐陽贛榆接境凡編里四十九

西北百六十里曰桃源縣本唐宿遷之桃園鎮厥河泗凡編里四十三

北百七十里曰沐陽縣後魏名漢厚丘陰平建陵不其河曰沐河周禮職方青州之浸曰沂沐沐至縣境分爲五道凡編里六十七

北三百七十里曰海州春秋邾子國秦胸縣漢戚胸孔望山孔子問官剡子登此山以望海羽山舜殛鯀焉禹貢羽畎夏翟曾氏註山雉五色出於羽山之畎

山名羽以此山下曰羽潭左傳鯀爲黃能入于羽淵  
梁山在縣東秦始皇射蛟焉巨平山北有孝婦廟東  
海孝婦也魚骨廟以鯨魚之骨爲梁以祀宋人之有  
道術者河曰薔薇源出于羽山于公浦漢于公所居  
凡編里九十三領縣一

州北七十里曰贛榆縣唐名漢東海縣祝其之城是  
爲夾谷公會齊侯者也紀鄆城春秋傳莒子奔紀鄆  
山河曰清河口曰朱稽曰廟灣于沙河凡編里五十  
六

北四百五十里曰邳州後周名夏邳薛二國秦下邳

縣磬石山近于泗書曰泗濱浮磬艾山產艾左傳齊侯會于艾良城春秋晉侯會吳子于良穀城山貴石所葆祠也沂河出于沂武河沭河入于黃河圯橋在城東隅凡編里四十七領縣二

州南百二十里曰宿遷縣唐名春秋鍾吾子國亦宿國所遷秦下相縣項羽生焉河曰木河河旁有馬陵山卽春秋同盟地凡編里五十六

州南六十里曰睢寧縣古郟子國卽國漢蘭陵繪承睢寧睢水出焉凡編里二十六

廬州府揚州之域分野斗周以前廬子國春秋時屬

戰國時屬楚秦九江郡地漢廬江國東漢合肥侯國三國魏唐廬州廬江郡宋保信軍皇朝爲府直隸京師領州一縣四洪武七年益以六安英山二縣弘治七年置霍山縣凡領州一縣六其山大蜀其水巢湖

附郭曰合肥縣漢舊縣黃山有峰三百六十周迴約二百里大蜀山蜀之爲言獨也此山單椒特峙矣青陽山余闕讀書焉頂山魏伯陽煉丹所也龍穴山張路斯與蓼人鄭祥遠竝爲龍戰于水鄭不勝投合肥西山以死龍穴山是也河曰金斗水曰肥水天文一



星在南斗曰合肥對九江星夾輔黃道而合肥入斗  
度最多爾雅歸異出同曰肥肥水之流一東南入巢  
湖一西北入淮水浦曰箏笛曹操溺妓浦中漁人夜  
聞箏笛聲焉嗟虞敷項羽別虞姬於此左路城項羽  
失道漁父左給之同食館唐刺史路應求所建韓愈  
爲記凡編里六十四

西南百一十里曰舒城縣唐名本舒國春秋時群舒  
叛楚漢龍舒縣漢高兄子羹頡侯之食邑梅福山福  
所隱也鼓樂山梁武帝未子寶誌云有高人隱此山  
中三生前爲伶官作樂可致後生昭明太子名山曰

縣和州之名起於北齊以與梁人盟於江北兩國以和元領歷陽含山烏江三縣國初以三縣省入洪武二年爲歷陽縣隸廬州尋改爲和州復折置含山縣以州直隸歷陽山山石文理成字四潰山項羽敗垓下走東城從者二十八騎依山爲陳漢兵追之四潰陰陵羽所失道也瀝湖在州西三十里周七十里淮南子歷陽之都一夕化而爲湖橫江在州東南二十里李白所爲詞也桐江古濡須江也亞父城范增所營凡編里四十一領縣一山曰瀝陽水曰瀝湖

州西五十里曰含山縣濡須山吳魏相拒地劉禹錫

陋室在州治禹錫爲此州刺史禹錫州廳壁記玄元有臺彭鏗有洞異有血閻祥有沸井昭關伍子所乞食也凡編里十七

滁州揚州之域分野斗宿春秋吳楚之交秦漢屬九江郡東晉北譙郡隋滁州唐永陽滁州宋滁州國初隸鳳陽府後直隸瑯琊山晉元帝爲瑯琊王避地於此有歐陽修醉翁亭豐山在州西南沛豐人常居之下潭曰栢子太祖微時洗背潭中龍爲蠮螬群集于皇胃免而下之爲龍天飛皇道山秦皇所經河曰滁河有滁陽王廟關曰清流宋太祖擒皇甫暉焉凡編

近也亞父山在縣東北二十四里八公山八公所居  
巢湖在縣西十五里周圍四百餘里港汊大小三百  
六十占巢合肥舒城廬江四邑地廖永安俞通海諸  
將結水軍湖中杆盜而歸舟於太祖者也有會吳城  
春秋哀公會吳于橐臯者也有拓臯之河回車巷孔  
子回車處也釣魚臺浮丘伯釣魚焉關曰東關在縣  
東南四十里天下有事必爭之地也凡編里二十  
西百八十里曰六安州古六國禹封臯陶後於此春  
秋六蓼國漢六安國治六縣指封山漢武南巡見其  
峻拔指封爲霍嶽之副武陟山漢武所陟是生六安

之茶凡編里六十七領縣二

州西南四百五十里曰英山縣本蘄州羅田縣東鄉地山曰英山塘曰潤州潤州水漲則塘水滿不流水消則塘水淺不竭凡編里二十七

霍山縣本六地故埠鎮弘治間刑部尚書鄭時以六安英山相離險遠奏立縣霍山高七千七百七十丈漢武南巡以衡山遠阻移祀嶽神于此山又名南嶽山河曰化龍三灣凡編里二十

安慶府揚州之域分野斗春秋皖國亦爲舒桐二國戰國時屬吳繼屬越後屬楚秦屬九江郡漢初淮南

王國文帝時分爲廬江郡唐東安州舒州盛唐郡同  
安郡宋德慶軍安慶軍安慶府皇朝改寧江府後復  
爲安慶直隸京師領縣六其山潛山其水長江

附郭曰懷寧縣東晉名晉陵之坂纍纍十餘里皆疑  
塚也至此有陵晉人關田見石門而止莫辨何代矣  
太子墩魏武至此生子今三軍聚土爲記盡忠之井  
余闕死處也風節之井余闕妻子死處也長風沙見  
李白長干之詩凡編里四十二

東北百五十里曰桐城縣春秋時楚附庸桐國漢樅  
陽縣呂蒙城在樅陽城門外浮山之山三十六巖七

十二峰可居可游盛唐山漢武過此作盛唐之歌魯  
砥山魯肅所居射蛟亭漢武南巡登天柱山自潯陽  
浮江射蛟江中舳艫千里自樅陽而出凡編里六十  
三

西北百二十里曰潛山縣元名潛山在縣西二十里  
一名皖伯臺或曰漢武所封霍嶽曰南嶽者是此山  
也是華子期樂長子左慈之所遊遁也上有二十七  
峰二巖四洞二池壘嶂層峰爲長淮捍蔽皖山與潛  
山連一名皖公山皖伯始封地天柱山與潛山連漢  
武登封焉三祖山有三祖塔山谷寺在其南梁實誌

所卓錫也黃庭堅愛其山水之勝讀書於此因號山谷道人應夢泉唐玄宗夢遊而賜之名潛水合皖水入于江有漢喬玄故居舒臺在縣南王安石嘗居此後封舒王凡編里六十七

西二百三十里曰太湖縣宋名司空山在縣西北一百六十里二祖傳衣三祖之地李白讀書于此是生常春之藤獨阜山石刻隴西李白所避地也太湖在縣西南今爲陸矣河曰後部曰馬路凡編里六十八  
西南二百七十里曰宿松縣晉名響石之山履如鼓響小孤之山獨跨于江中分經臺高百餘丈昭明太



子分佛經于此湖曰鹹湖鹹魚生焉凡編里五十四  
西南百二十里曰望江縣隋名孝感山唐徐仲源所  
居孟宗臺孟宗爲漁官居此臥冰池在縣南王祥與  
母弟于此避地池雖極寒不冰中如人臥之形邑人  
重祥而異此水遂以名池凡編里十七

太平府揚州之域分野斗春秋吳地繼爲越戰國屬  
楚秦屬鄣郡漢丹陽郡地宋太平州元太平路太祖  
渡江首得此路遂改爲元帥府後爲府直隸京師領  
縣三山曰橫望水曰丹陽

附郭曰當塗縣晉湖縣東晉時以江北當塗流民南

渡者衆乃僑立當塗縣於湖橫望出春秋楚子重伐  
吳所至地其山四望皆橫上有陶弘景隱居石門古  
祠白紵山桓溫攜妓而聽白紵之歌靈虛山丁令威  
飛昇於此青山謝眺築室李白所葬也黃山浮丘翁  
放雞於此有宋離宮及凌歊懷古二臺采石山昔人  
於此採石臨江磯曰采石磯常遇春所先登者也牛  
渚山有牛渚磯溫嶠燃犀焉連磯山謝眺所賦詩金  
山出銅類金名丹陽銅九井山桓溫鑿九井殷仲文  
九日從溫登山賦詩湖曰丹陽溪曰姑熟人則陶安  
凡綿里一百六十九

西南六十里曰蕪湖縣漢名以其地卑水生蕪藻晉曰逡迤赤鑄干將鑄劍焉赭山在縣西北五里郡以名丹陽蠓磯山在大江中有石穴蠓居焉蠓老蛟也有上黨郡城淮南郡晉時僑立以處上黨淮南民之南渡者江曰魯明河曰長河凡編里三十五

西南百六十里曰繁昌縣東晉名東漢春穀縣地浮丘山浮丘翁所名隱靜山杯渡禪師道場也三山磯宋陳堯佐泊舟磯下有老叟先言風堯佐如言避之明果大風行舟盡溺叟見堯佐某江之遊奕將也公他日當相故來相語凡編里十三

寧國府古揚州之域分野斗宿春秋屬吳後入越戰國爲楚秦屬鄣郡漢置丹陽郡治宛陵東漢丹陽郡唐宣州宣城郡宋宣州寧國府皇朝直隸京師領縣六山曰敬亭水曰宛句

附郭曰宣城縣敬亭之山謝眺李白所詠也又山曰陵陽又山曰華陽高數百仞跨宣涇寧旌閭厥河珍珠厥溪宛與句凡編里二百一十六

東南百里曰寧國縣文春山高數千仞周廣二百里晉瞿劭先生所居文春之北曰鴉山產茶焉石鏡山上石鏡黃巢過此鑑之若獼猴怒而燒之石昧久

乃光厥溪東與西凡編里五十六

西南一百里曰涇縣漢舊縣以涇水名大城山晉郭璞嘗鑿山椒以觀潮候琴高山琴高所隱承流山竇子明所隱也厥溪賞溪亦曰涇溪凡編里六十八南三百十里曰太平縣唐名黃山歛之黃山也其隅在縣南厥溪富凡編里十九

南二百二十里曰旌德縣唐名石柱山程靈洗起兵討侯景於此誓衆徽水出于徽嶺厥溪豐與東凡編里四十

西一百里曰南陵縣梁名漢春穀縣山曰工山高數

百丈盤據七十里射的山石壁有玉莫得取居人之  
謠曰射的白米斛百射的玄米斛千凡編里八十四  
池州古揚州域分野斗宿春秋屬吳滅于越後屬楚  
秦鄣郡漢丹陽唐宋池州皇明直隸府領縣六山曰  
齊山水曰大江

附郭曰貴池縣齊山在東南群峰齊等故曰齊山或  
曰唐刺史齊映好此山空巖靈異響石飛泉不可具  
記也秀山有梁昭明太子墓太子生而悅之既卒降  
于民上帝賜我矣民請太子衣冠葬此名其廟曰文  
孝之廟其城曰石城以東西兩石夾河如城高獲墓

在城西獲與漢光武有舊舉孝廉不就河曰池口浦  
曰秋浦隋以名縣唐李白杜牧皆有詩凡編里四十

二

東八十里曰青陽縣九華山在縣西南四十里高數  
千丈延袤百八十里合諸峰凡九十有九舊名九子  
山李白易此名河曰五溪源出九華曰池曰龍曰漂  
流曰雙曰澗合流入于江凡編里十六

東北百二十里曰銅陵縣銅官之山其下有泉烹鍊  
浸銅於是乎取之河曰銅陵凡編里十六

西百八十里曰東流縣凡編里六

西南百八十里曰建德縣有茹蘭堯城二溪凡編里九

南百六十里曰石埭縣陵陽山漢竇子明所飛昇也溪曰貢源凡編里十

徽州揚州之域分野斗春秋屬吳繼屬越戰國屬楚秦置黟歙二縣屬鄣郡漢屬丹陽吳分置新都郡晉新安隋歙縣唐歙州新安郡宋徽州皇朝初爲興安府後仍曰徽州直隸京師領縣六山曰黃山水曰新安徽之爲言美也村曰徽村嶺曰徽嶺溪曰徽溪

附郭曰歙縣秦名謂山川翕聚也山曰烏聊黃山舊



名黟山盤據宣池江浙諸郡爲鎮于徽峰二十六泉  
三十六溪二十四洞十二黃帝與容成子浮丘公游  
焉山有湯泉色如丹砂浴之已疾趙汭曰黃山隕然  
居中委和四表有坤道焉故名黃山紫陽山朱熹父  
松愛此山故熹以紫陽名其堂相連南山有許真人  
丹池魚四足有翼色蒼如蚯蚓玉屏山太祖跽蹕焉  
新安江之源一出歙之黟山一出休寧之率山一出  
績溪之大鄣一出婺源之浙嶺皆達于歙浦會流至  
嚴州合金華水入浙江爲灘三百有六十水清流見  
底揚之水源出于績溪湖曰篁墩程靈洗射蜃焉少

保井是薛稷所鑿稷嘗爲黔令李善長云是此縣人  
藏修縣之靈山兵亂流寓于定遠得謁見于太祖凡  
編里二百有八

西六十里曰休寧縣山曰率山水曰率水山海經曰  
浙江出三都山在率東蓋此山也酈道元水經改率  
山曰蠻中又溪曰漸溪漢書陳嬰定豫章浙江都漸  
顏師古曰漸在黔縣南蠻中白嶽之山齊雲之巖學  
仙者居之嘉靖中改巖爲山建玄天太素之宮山曰  
善山曰惡山善山爲君惡山爲夫人分祭則灾合祭  
則福凡編里一百六十

西南二百四十里曰婺源縣以婺水繞城名婺星乘  
鯨上天是以名水今縣有大鯨嶺是也石耳山界浙  
衢州不可勿計浙源山其水會于歙浦入于浙婺水  
西入于鄱陽龍尾山一名羅紋山唐開元中蒙氏獵  
山中見石可研琢之遂名天下是地有朱熹闕里井  
曰韋齋熹父松生時井氣白熹生時井氣紫凡繡里  
百二十八

西百八十里曰祁門縣山曰祁門其山如旗西南對  
峙如閭門新安山靈氣清淑爲邑勝壤是以名郡赤  
嶺之溪有魚能飛化而爲石雨則石赤故名赤嶺有

梅鎬城凡編里四十七

西北百四十里曰黟縣以縣居黟山之陽或曰以墨嶺出石墨又云新安貢柿心黑木因以名縣山曰吉陽水曰吉陽碧山李白所栖也凡編里二十六

東六十里曰績溪縣縣界乳溪與徽溪相去一里離而復合有如績然大鄣山秦立鄣郡焉大葵山山產異菜其形如玉食之可仙蘇轍嘗知此縣凡編里二十四有半

廣德州揚州之域分野斗宿春秋屬吳名桐汭後屬越戰國屬楚秦鄣郡地漢丹陽郡故鄣地鴻嘉初封

中山靖王後爲廣德國東漢分置廣德縣隋綏安縣  
唐置桃州後爲綏安縣至德初爲廣德縣宋廣德軍  
建平縣皇朝初爲府置廣陽縣洪武中爲直隸州以  
廣陽建平屬之十三年省廣陽入州靈山有泉石之  
奇橫山有張渤廟其神最靈載祀典水曰桐川皇朝  
名臣遷謫多在此州凡編里百二十七

州西北九十里曰建平縣伍牙山伍員伐楚還吳建  
牙於此馬履澗伍員之馬過此水湧鴉山產茶凡編  
里百一十

和州揚州之域分野斗春秋屬吳戰國屬楚秦歷陽

鼓樂春秋山有宋李公麟讀書堂龍眠山公麟以爲  
號多智之山飲泉能智縣東南六十里曰六城阜陶  
後所封河曰石塞有石塞于河中七門堰惠蹟堰皆  
羹頡侯所築渚曰鵲尾左傳楚伐吳吳人敗諸鵲岸  
杜預註舒城鵲尾渚也人曰文翁包拯凡編里四十  
五

南百八十里曰廬江縣梁名冶父之山其山獨尊故  
名爲父左慈并慈置丹焉水簾洞慈嘗喝石以塞洞  
口湖曰白湖人曰毛義凡編里十九

東南二百八十里曰無爲州元名商時巢國漢居巢

臨湖襄安三縣地毛公山有毛公洞石壁盡刻毛詩  
紫芝山宋皇祐間生紫芝三百五十本笑泉呂洞賓  
卓劍而湧人有笑漫泉湧益甚官廨石宋知軍米芾  
所拜墨池芾鑿也寶晉齋芾所建墨池鬧蛙芾押瓦  
投之蛙遂永息稻孫樓芾出觀禾田則獲矣又若有  
秋老農曰稻孫也濡須塢神禹所鑿萬卷堂宋景仙  
藏書之堂書多於秘閣凡編里四十七領縣一  
州北九十里曰巢縣隋名古巢伯國成湯放桀焉秦  
居巢縣半湯山有二泉一寒一溫金庭山道書十八  
福地也踟躕山左傳楚子觀兵于坻箕坻箕踟躕音

里十二領縣二

州南五十里曰全椒縣九鬮山項羽敗與漢兵一日九戰於此鄮湖魏置鄮縣焉水曰襄水凡編里十二州北三十五里曰來安縣河曰龍尾凡編里七

徐州見禹貢古大彭氏國是顓頊之後彭祖封焉春秋宋地戰國屬楚秦置彭城縣屬泗水郡項羽自立爲西楚霸王都此漢高爲沛郡又分沛置楚國後爲彭城郡復爲楚國東漢彭城國晉武於淮南僑立南徐州以處渡江者安帝分淮北曰北徐州淮南但爲徐州劉宋改北徐州曰徐州加淮南徐州曰南徐州



唐徐州彭城郡武寧軍感化軍宋武寧軍徐州皇朝  
初隸鳳陽府後爲直隸州桓山桓魋所作石槨也楚  
王山有楚元王墓山皆赭土禹貢所貢惟土五色境  
山古徐封境界於此山呂梁山下有二洪皇朝主事

費瑄王儼先後剡治無復孔觀之險

蘇瑛云孔觀原不在徐州徐州

之洪於萬曆癸卯洪崖得石有唐尉遲敬德之題云亦呂梁山今之相傳忘其亦字矣

城東南二

里曰百步洪平江伯陳瑄侍郎杜謙主事郭昇亦先  
後剡治以便河運水曰泗曰汴曰睢曰穀項羽敗漢  
睢水上水爲不流楚破漢軍漢軍走入穀城曰迷劉  
項羽敗漢軍漢軍夫高帝所在又城曰舞陽樊噲所

封監曰利國漢置鐵官臺曰戲馬項羽之臺也樓曰黃樓蘇軾所作城東南五十里曰雍門是爲雍門之參發孟嘗之哀有華陀塚凡編里百有五領縣四

州西五十里曰蕭縣隋名古蕭子國春秋楚人滅蕭遂爲宋邑左傳宋群公奔蕭綏輿山劉宋高祖是綏輿里人杼秋城在縣西北光武封劉般爲杼秋侯有子張墓凡編里四十六

州西百七十里曰碭山縣東漢名秦碭縣漢高微時隱芒碭山兩山也凡編里二十

州西北八十里曰豐縣漢縣大澤在治北漢高母夢

與神遇西澤在治西漢高送徒驪山止飲於此厭氣  
臺在城內秦始皇所築以厭王氣粉榆社漢高鄉社  
也漢高故宅在豐水東九十里朱陳村在縣東南一  
百里凡編里十九

州西北百二十里曰沛縣秦縣古偃陽國春秋晉悼  
公滅偃陽沛宮在縣東南泗水亭漢高亭長於此歌  
風臺臺在泗西岸水曰祖水春秋會吳于祖後漢書  
彭城國偃陽縣湖曰昭陽鴻溝在縣治東十里仲虺  
是此縣人凡編里三十八

親軍

金吾前衛

金吾後衛

金吾左衛

金吾右衛

羽林左衛

羽林右衛

羽林前衛

府軍衛

府軍左衛

府軍右衛

名山藏

卷之六

南京

三

府軍後衛

虎賁左衛

錦衣衛

旗手衛

江淮衛

濟川衛

孝陵衛

犧牲千戶所

在京

四守左衛

鎮南衛

水軍左衛

驍騎右衛

龍虎衛

英武衛

龍虎左衛

舊爲成都右護衛宣德六年改調

龍江右衛

瀋陽左衛

瀋陽右衛

虎賁右衛

留守右衛

水軍右衛

武德衛

廣武衛

留守中衛

神策衛

廣洋衛

應天衛

和陽衛

留守前衛

龍江左衛

龍驤衛

飛熊衛

天策衛

豹韜衛

豹韜左衛

舊爲成都右護衛宣德六年改調

留守後衛

橫海衛

鷹揚衛

興武衛

五丁

卷之二

輿地記

四



江陰衛

在外直隸

蘇州衛

太倉衛

鎮海衛

金山衛

新安衛

安慶衛

泗州衛

壽州衛

宿州衛

舊爲宿州千戶所

武平衛

舊屬河南都司

淮安衛

大河衛

邳州衛

揚州衛

高郵衛

儀真衛

滁州衛

徐州衛

卷之二

二

輿地記

卷之二

二

沂州衛

歸德衛

舊屬河南都司

鎮江衛

此下各衛所後設

廬州衛

六安衛

徐州左衛

以舊武昌中設衛改

建陽衛

嘉興中左千戶所

吳淞江千戶所

真山千戶所

劉河堡中千戶所

崇明沙千戶所

松江中千戶所

青村中前千戶所

南匯觜中後千戶所

東海中千戶所

海州中前千戶所

鹽城千戶所

興化千戶所

通州千戶所

秦州千戶所

汝寧千戶所

舊爲衛屬河南

莒州千戶所

中都留守司

鳳陽衛

鳳陽中衛

鳳陽右衛

皇陵衛

留守左衛

舊無後設

留守中衛

長淮衛

懷遠衛

六安千戶所